

SAN PEDRO KARTA NYAFXTE FXI'JNI

Vxite kiwesu u'p-ya' u'jsatx Pedro fxi'jni

¹ Adxa' Jesukristo jxkaahnisa Pedro yaaseth. Naa karta's fxi'jaçthu vxite kiwesu u'p-ya' u'jsawe'stxxi, Ponto, Galacia, Kapadocia, Asia, Bitinia txâa kiwesuwe'stxxi.

² I'kwe'stxxi txhitxhwa'ja's Dxus kwe'sx Tata' nyafxiitey ma'wêne' pheu'jçxa ji'phu' txâ'sa' kxtey yuuk. Txâasak Dxus Espiritu' i'kwe'stxxi ewmeejũ txuhdeçxa Jesukristo eeju nuyaate Jesukristoçxá's nwêese'khan. Txâ'wê Dxus pu'çxpa'ga açxha' seena' wala wêt mfxi'zewe.

Na'wêsa's jxpa'gaya' üythasna fxi'zeni

³ Açxha' kwe'stxxi jxpe'jsa Jesukristo Tata's weçxana tuuthe'jega. Txâ' kwe'sx ewmeesatewa peeYGâhçxa ki' u'se upxxa na'wê yuuwa'ja's vx-itku, nawa Jesukristo kwe'sx pa'gate uuçxa ki' îtxi yuupa'gaçxáak txâ'wê yũu.

⁴ Txâa pa'gak ew jii ya'fxi'ze', Dxusa' cielute kwe'stxxi üswa'j jxaawni ji'pha' txâ'sa' jxpa'ga'nja'w sũhna üythasna. Txâ' bagaçxte yuhwa pçumeena sa' suweewameena sa' vxituwameena.

⁵ I'kwe'sxa' Dxusa's üuste jxpubamée yaakxwa'ja's ji'phi'kwe, naa pa'ga txâ' i'kwe'stxxi jxaawuuna nmeh en ähte i'kwe'sx cielute pa'jwa'ja's pheu'jçxa ji'pha' txâ'sa' jxpa'gakahn.

⁶ Txãa pa'ga i'kwe'sxa' iiméh wala weçxana meswe, makwe maa enteya' nxuswa'j en ma'wēsawa pa'thewa.

⁷ Txãa pa'gatey nxuswa'j en thēysa pa'ja'tx txã' Dxusa's jxpubamée jwee iicxáa çxhãçxha yaakxwa'ja's pheu'jsata', vxyuu beja'swa ew zhiçxkwe neeyũukahn ma'wēga ipxte kabçxa ya'pheu'ju' txã'wēy. Aça' makwe thēysa nxuswa'j en pa'thewa Dxusa's jxpubamée yaakxni's ivxiitusame' vxyuu beh pçusaate jxthaakwe pa'gasa yuuna. Txã'wē yũusa' isa weçxana jxtuhthesa yuune'kwe naa kiwete Jesukristo kii ente'.

⁸ I'kwe'sx yafxju yu' Jesukristo's uymeeçxawa, peeygãhçxa nwēese'je'i'kwe, sa' uymeeçxawa txã'sna yajkxçxa iiméh seena' wala ũuste weçxweçxa yaaki'i'kwe. Txã'wē ũuste iiméh seena' wala zhiçxkwe wētwe't yaakxni's pta'sxya' ya'ãja'çme'.

⁹ I'kwe'sxa' txã'wē Dxusa's jxpubamée yaakxwa'ja's ji'phupa'ga i'kwe'sx ũusa' ewte neeyũuna.

¹⁰ Dxus peeygãhçxa i'kwe'sxtxi ewte nvxi-itwa'ja's jiyuçxa pta'sxsá nyafxíi enteywe'sxa' wala paapējxna atxahtx ewte neeyũuwa'j jīni's.

¹¹ Txã'wē Dxus Espiritu' txãawe'sxtxi' dxi-ikhēy kaajiyu'kh ewte nvxiitwa'jsa' wala pxthaa yuuçxawa txãa e'su' wala jxtuhthesa yuuwa'jsa' jīna. Txãa pa'gatx Dxusna selpisaawe'sxa' jiyu wēe txã'wē yuuwa'jsa' kimki sa' bagaçxki açki'k Dxus Espiritu' txã'wē pta'sxi' sũhna.

¹² Txã'wē paapējxna ũste', Dxusa' txãawe'sxtxi pejka kaajiyu'kh txã'wē pta'sxnisa'

i'kwe'sx jĩi meea', vxite ensuwe'sx jĩia' jĩk. Txã'wẽ ewte neeyũuwa'j seena' wẽtwẽt-sa's Dxus ũsku txã'sa' angeleswe'sx yuhwa jweeĩçxáa wala jiyuwaça' sũju'tx, txã'wẽ seena' zhiçxkwesa pa'ga.

Kĩh pkal yuhwa ji'phmée fxi'zekahnku Dxusa' pa'ya

¹³ Txãa pa'ga ew miiyajxwe ma'wẽ ew fxi'zewa'ja'swa wala jxpa'yakx. Dxusa' i'kwe'sxtxi peeygãhçxa Jesukristo vxyaa ente' ũsya'wa' txã'sçxáana ũythasna meswe.

¹⁴ Nwēese'jsa luuçx na'wẽ myuuwe. Nyafxiaa' Dxusa's jiimeeçxa' ma'wẽkwe peekx ũus yaakxni ewmeesateçxáa fxi'ze' txã'wẽ yũunuwe,

¹⁵ wejxwa ũusuh jxuka ewmeejũ txuteeçxa ũuste kĩh pkal yuhwa ji'phmée mfxi'zewe, txãa pa'gatey i'kwe'sxtxi pa'yasa Dxuswa kĩh pkal yuhwa ji'phmeesa' naa pa'ga.

¹⁶ Txajĩik Dxus libroute na'wẽ we'we': I'kwe'sxa' kĩh pkal yuhwa ji'phmeesa myuuwe, adxwa kĩh pkal yuhwa ji'phmeesath naa pa'ga jĩ'k.

¹⁷ Miiyajxwe Dxusa' kwe'sx Tata' jĩna kx-susu'i'kwe txã' kim yuhtxwa nvxihtmée jxuka pẽywa'jsate jiiçxa', ũukhna mfxi'zewe naa kiwete makwe txaçx itxi fxi'ze'ççxawa.

¹⁸ Yaçgawe'sx ma'wẽ ewmée fxi'zete', i'kwe'sxwa txã'wẽy ewmée fxi'zenijũ Dxusa' nwe'wek. Sa' i'kwe'sxa' ew jii i'kwe txã'wẽ nwe'wepa'ga kĩh yuhwa ya'dukhme' naa kiwete pçuwa'jsa ũsta' vxyuu beh vxyuu çxihme txã'wẽsa yakhçxáa yuhwa.

19 Naasáa Jesukristo ee yakh yuuçxáak dukhnisa yuu. Txã' piisxakuẽ kĩhte yuhwa ãça'meesa ewsa's ikhçxa pkaltxi yaateya' kabnisa na'wêk yuu.

20 Kristo' txã'wê yuuwa'kh txhitxhnisa yuu naa kiwe meetey, nawa naa ensuçxáak txã'wê yuuya' vxyaa i'kwe'stxxi nwe'weya'.

21 Kristo txã'wê yũupa'ga i'kwe Dxusa's jiyuya' ãja. Dxus íik Kristo uutewa itxi vxitçxa tuhthe nvxiht, Dxus yuuçxáana yajkxna ũythasna fxi'zekahn.

22 Æçxha' i'kwe'sxa' Dxus Espiritu pu'çxte', isa pta'sxni's wêse'jçxa', i'kwe'sx ũustxi yaate i'kwe ũusuh jxuka yajkxçxa yakhtthê'jwe'stxxi peeygãjxa'. Txã'wê yã'jçxa', puutx teeçxsa na'wêçxah ya'mpeeygãhwe ũusuh jxuka ya-jkxna.

23 Txãa pa'gatey i'kwe'sxa' nasa naa kiwete pkalsa ji'jmée, kĩh pkal yuhwa ji'phmeesa ji'ji'kwe yuu. Dxus yuwe bagaçxte yuhwa pçuwa'jsame's wêse'jçxa i'kwe txã'wê yuu. Dxus yuwe' bagaçxte yuhwa pçuwa'jsame'.

24 Txajíik Dxus libru' na'wê pta'sxi':

Naa kiwete nasa' jxukaysa skhẽwwa'jsaçxáata'.

Txãawe'sxa' makwe seena' wala jiisaçxawa, jxũth tasx na'wêsaçxáata'.

Jxũthwa uhdxte', kitewa wete'k txã'wêysaçxáata'.

25 Nawa Dxus yuwe' bagaçxte yuhwa pçumées nes yuuwa'jsa' jĩ'k.

Txãa Dxus yuwe's íik i'kwe'stxxi pta'sxni yuu.

2

¹ Txãa pa'ga ewmée yũuya' yaakxni's jxuka manvxihtwe. Īsxiinisa, yuwejuçxáa ew we'weçxa' ũuste yu' ewmée yaakxni, vxitetx açeyaakxni, e'sgaçxáa ewmée nuywe'weni txã'wēsaxi' nvxihtçxa,

² luuçx u'se kasehsawa ma'wēga leçxi ewsaçxá's jxpaga', txã'wēy i'kwe'sx ũuste ew kçxhãaçxha'jwa'jsaçxá's mpaakwewe. Txã'wē yũuçxa Dxus yakh çxhãçxha fxi'zene'kwe ewte neeyũuya'.

³ Txã'wē myũuwe, kwe'sxtxi jxpe'jsa ewsatewa ew jiyu dxihçxa'.

Kwet ĩtxisa na'wēsa' Kristo'

⁴ Kwe'sxtxi jxpe'jsa tasxte mutxaawe. Txã' kwet ĩtxisa na'wēsa'. Txã'sa' naa kiwete nasa' ahçetx, nawa txãaíik kwet jxthaakwe ewsa Dxus txhitxhnisa yu'.

⁵ I'kwe'sxwa kwet ĩtxisa na'wē i'kwe naa pa'ga Dxusa' i'kwe'sxtxi' txajx ũswa'j yat na'wēsak vx-itu', sa' txã'wēçxáamée kīh pkal yuhwa ji'phmée txajx tasxte yuuçxáa selpiina ũswa'jsak vxit, txãa pa'ga txajx tasxte utxaaçxa ewsa yuuçxá's kxtey myuuwe. Jesukristo pu'çxte', i'kwe'sx txã'wē yũuni's Dxusa' jxpaga'ana.

⁶ Txã'sna we'weçxak Dxus libroute na'jĩ': Yat txaahwa'j kwet txhitxhnisa iiméh ewsa nvxi-ituçthu Sion judiuwe'sx kiwete, Aça' txã'sa' maawa jxpaga'sa' jxpubasáa yu-umeena jĩ'k.

⁷ I'kwe'sx ew jiyusa yakh yu' txãa kweta' iiméh wala ewsa'. Nawa jiyusamée yakha'

na'wêçxáak ya'yu' txã'wẽ yũuni's Dxus librute
na'wêk we'we':

Yat txaahsawe'sxa' kweta's ahçexxa
wãatãhtewa,

E'suyã'ja' txãaíik thaakwe ewsa yuuna pa'j jĩ'k.

⁸ Vxite ajkhẽ' txãa kweta'síi we'weçxa':

Kweta' kxu'çxafxi'jçxa pẽtxsaçxá' jĩ'k.

Dxus yuwe's pta'sxtewa, txãawe'sxa' kxtey
nwẽese'jsame' jxpubasaata', jiyuwa'jsamée
ne'ta yu' naa pa'ga.

Nasa Dxus txhitxhnisa

⁹ Nawa i'kwe'sxa' Dxus txhitxhnisai'kwe,
txajx tasxte yuuçxáa selpiina ũswa'jsa. Dxus
kusetewe'sxi'kwe, kĩh pkal yuhwa ji'phmeesa.
Txãa pa'ga Dxus txakwe wala i'kwe'sxtxi
ewte nvxiitni's pta'sxwa'j ji'phi'kwe. Txã'wẽ
yũukahnkũ pa'ya, jiimée jxpubana çxhi'dxte
ũsnijũ kasehçxa zhiçxkwe eena'te pa'khan.

¹⁰ I'kwe'sxa' nyafxiaa' Dxus jĩi yu'çmée i'kwe,
nawa açxha' Dxus jĩi i'kwe. Nyafxiaa' kim yuhwa
peeygãanisamée i'kwe yu', nawa açxha' Dxus
peeygãanisa i'kwe.

Dxusna selpiina yuuçxáa mfxi'zewe

¹¹ Adx yakthẽ'jwe'sxtxith neewe'we':
I'kwe'sxa' naa kiwetewe'sxmée yã'ji'kwe, txãa
pa'ga peekx kakwe ewmée yũuya' yaakxnitxi's
nwẽese'jnuwe. Txã'wẽme' ũusa's suwsaata'.

¹² Dxusa's jiimeesawe'sx ksxavxysu wala ew
mfxi'zewe. Txãawe'sxa' açxhĩi yu' wala
açewe'we'tx i'kwe'sxtxi ewmeesa na'wẽ. Nawa
Kristo kĩi ente' i'kwe'sx ew yũuni's uyçxa', Dxus
luuçx yuh yu'ta jĩna tuuthe'jetxna.

¹³ Dxusa's jii yã'jsa' jxuka mwēese'jwe naa kiwete jxkaahwa'jsa nvxiitni ũsta' txāawe'sxtxi, jxkaahsa npiičthē'jsa ma'k yuu,

¹⁴ meeçxa' jxkaahsa nuuçxa ma'tx yuu nawa jxuka. Txāawe'sxa' Dxus kaahnisata' ewmée yūusatxi' kastigāyna vxite' ew yūusatxi' nwe'wesa.

¹⁵ Txāa pa'gatey Dxusa' i'kwe'sxtxi' ewku yūu jxthāasu' vxitetx, txā'wē yūuçxa açewe'wesatx sxuuna' vxit-ya'.

¹⁶ Dxus nwe'wenisa yã'jçxa', ew mfxi'zewe. Nawa nwe'wenisa yã'tha'w aça' kimwa ma'jīmeena sūhçxa ewmée yūunuwe, wejxwa Dxus kusete selpisaatha'w sūhna ew yūuwa'jçxá's yajkxna mfxi'zewe.

¹⁷ Jxukaysa yakh ewçxáa mfxi'zewe, yakthē'jwe'sxtxi peeygāhna, jxkaahsawe'sxtxi nwēese'jna, Dxusnawa txā'wēy nwēese'jna.

Kristowa ma'wēga pkxuuni yuu txā'wēy myu-uwe

¹⁸ Selpisaawe'sxa' i'kwe'sx patrontxi wala jxpa'yakx nwēese'jna kxtey myuuwe. I'kwe'sx patron ewsaçxáatx txā'wē yūumée, patron seena' juuna'satxwa ewçxáa myūuwe.

¹⁹ Kīhwa āhmée yūumeete Dxus yakh fxi'zepa'gaçxáa patronwe'sx txā'wē kastigāyte', txā'sa' nxuswa'jme'.

²⁰ Nawa i'kwe'sx āhmée yūute kastigāyte', yuuwesatha'w naa pa'gatx kastigāy sūhwa'jçxá'. Nawa i'kwe'sx ew yūupa'gaçxáa nxuswa'j ena's ji'phute', Dxusa' peeygājana.

²¹ Txā'wēte fxi'zekahnku Dxusa' pa'ya, i'kwe'sx pa'gate Kristo' yuuwemeesaçxawa pxthaa

yuuk txãa na'wěy yuuwemeesaçxawa pkxuuni yuukahn.

²² Txã' kîh pkal yuhwa yũume', sa' kim yuh-nawa ãsxiime'.

²³ Wëesxusatxi's ka'tuwa wëesxuuna pasme'. Pkxuusaatxi's txã'wě yũupa'ga i'kwe'sxwa ewmeete neeyũune'kwe jîna pasme'. Txã'wě yũumée wejxwa Dxusçxáanak neewe'we.

²⁴ Kwe'sx pkaltxi's Kristok kluuste uuçxa ivxi-itu, kwe'sxa' peena' yu' pkalte fxi'zemée Dxus dxi'pte ewçxáa fxi'zekahnku txã'wě yũu. Kwe'sx pkala' yaateni yuukahnku txã' pkxuuni pxthaa yuu.

²⁵ I'kwe'sxa' nyafxia' piisxáa vxitusa na'wě i'kwe ũsu', nawa ãçxha' Kristo tasxte sx-awedi'kwe, txã' piisxáa thegsa na'wěk jxpe'je' i'kwe'sx ũustxi.

3

Ptamsa' na'wě fxi'zewa'ja'

¹ U'ywe'sx iimi'sawa, i'kwe'sx nmi'tx kxtey nwëese'jna mfxi'zewe. Txã'wě yũute', i'kwe'sx nmi' maáia' Dxus yuwe's wëse'jya' wa'lsawa

² i'kwe'sx ew fxi'zeni's uyçxa', Dxusa's jiyuna pa'jatxna, Dxusa's mpaakwe jîna we'wemeetewa.

³ I'kwe'sxa' peekx kakwe ãakhëwe'sxçxá's txakwe wala zhiçxkwesa ki'pna pheu'jwa'j ji'phmée i'kwe,

⁴ wejxwa ũuste txã'wě zhiçxkwe mpheu'jwe, ew yũuwa'jçxá's yajkxna, vxitesa yakh puiimée fxi'zewa'ja'sçxáa pakwena. Txãaçxáa thaakwe ewsa' Dxus dxi'pte.

⁵ Nyafxíi entey u'ywe'sxa' txãawe'sx ũustetx txã'wẽ zhiçxkwe pheu'ju' Dxusçxáana neewe'wena txãawe'sx nmi'tx nwẽese'jna.

⁶ Sara' txã'wẽsak yu'. Abrahana's ũ'kwe's jxpe'jsa' jĩnak nwẽese'je', aç'a' i'kwe'sxwa txãa na'wẽysa yuune'kwe, txã'wẽy ew nwẽese'jçxa yu', ãhmeeth yũu sũhna ũukh yajkxna fxi'zemeene'kwe.

⁷ Txã'wẽy nmi'we'sxwa i'kwe'sx nyuu yakh jxpa'yakx ewçxáa mfxi'zewe, u'ya' wejxkuẽ' çxhãçxhameekweta' txãa pa'ga. Sa' txã'wẽçxáamée, i'kwe'sx na'wẽyçxáa Dxus yakh fxi'zesata' txãa pa'ga txã'wẽ ew mfxi'zewe, Dxus yakh puutx we'weni' kxul yuukahmen.

Ew yũupa'ga nxus knaysáa

⁸ Jxukaysa i'kwe'sxa' ewçxáa yũuna mfxi'zewe, vxitesatxwa teeçxsa na'wẽçxah peeygãhna. Weeçx yajkxmée zhiçxkwe puutx we'wena yakhthẽ'j pwe'sx na'wẽ mfxi'zewe.

⁹ Ewmée yũusa's ka'tuwa txã'wẽy ewmée yũuwa'jme', sa' wẽesxute', txã'wẽy ka'tuwa wẽesxuwa'jme', wejxwa txã'wẽ yũusatxi' ka'tu yu' ewçxáa myũuwe. Txã'wẽ ewçxáa yũukahn iĩçxáak Dxusa' i'kwe'sxtxi pa'yaçxa txakwe wala ew yũu.

¹⁰ Txã'wẽ yũuwa'ja's na'wẽk pta'sxi' Dxus li-brute:

Maawa ewçxáa wẽt fxi'ze wẽeçxa',
Peekx thune's ewmée we'wekahmen
jxpa'yakxçxa

I'kwe'sx yuweju iĩxiinuwe.

¹¹ Ewmeejũ txuteeçxa, ewçxáa yũuna

Puiimée fxi'zewa'jçxá's pakweçxa uu entepkaçx
txã'wě yuuçxáa fxi'zewa'ja'.

¹² Txãa pa'gatey Dxusa' jxpe'je'k ew yūsaxti',
Sa' Dxusa's pakwen neewe'weni's wěse'je'k.
Nawa ewmée yūsaxti' txã'wě yū'çme' jī'k.

¹³ Bagaçxtewa i'kwe'sxa' ewçxáa yūuçte', ¿kim
txã'wě ka'tu' ewmée yūukx?

¹⁴ Ew yūuna fxi'zepa'ga nxuswa'j en
ji'phuçxawa, weçxana wētweṭçxáa meswe. Kim
yuhtxwa ūukhnuwe kuh yajkxna,

¹⁵ wejxwa i'kwe'sx ūuste jxkaahsa Kristoçxá's
weçxana mneewe'wewe. Na'wě i'kwe'sxtxi
kaapiya'jni's jii i'kwe txã'sna paapēysaxti's
pasya' thaamemée meswe bagaçxtewa, sa'
ūusçxa we'wemée ewçxáa mpaaswe.

¹⁶ Txã'wě ew yūuçxa mfxi'zewe, i'kwe'sx ūuste
yuuwemeetha'w sūhwa'jçxáa ūusuthekahn,
kxah Kristo yakh ew fxi'zesax e'sga ewmée
nuywe'wesawe'sxa' thaameetxna, txã'wě
i'kwe'sxtxi ewmée nuywe'weçxa'.

¹⁷ Wejxwa ewmée yūuçxa nxus knayupkaçxte,
ew yūupa'ga nxus knayni wejx ewa', Dxus yuu
txã'wě jxthāas yā'the'.

¹⁸ Kristowa txã'wēyku pxthaa yuuçxa uu, tee
dxi'jçxáa jxukaysa pa'gate. Txã' ewsak yu', nawa
kwe'sx ewmeesa pa'gate pxthaa yuuk Dxus tasxte
nuypa'jya'. Txã' isa uuyujk kakwe yu', nawa ūus
yu' uume'.

¹⁹ Txāasak u'j uusaawe'sx ūus preesu ūsu'tx
kxtee pta'sxya'.

²⁰ Txāawe'sxa' nyafxii Noé ente'
nwēese'jsameetx yu' Dxusa's. Txāa ente' Noea'

barko's pheu'ju'çpkaçxha', Dxusa' wala yuh ãythasku txãawe'sxtxi' nwe'weya'. Nawa oçxo nasaçxáatx yu'ju nwe'wenisa yuu.

²¹ Noé ente yu'a' ãçxh yu'te ya'bautisaĩ'tha'w ewmeejũ jxukate txuteeya' sũhçxa txã'wēsak yu'. Nawa bautismo' pkala's yaate'çme', naasáa Dxus dxi'pte peena yu' pkalte fxi'zeya'mée sũhçxaçxáak ya'bautisãynisa yu'. Aça' Jesukristo uuçxa ki' ãtxi yuunisa yuuçxáak kwe'sxtxi' nwe'we.

²² Æçxha' txã' cielun u'jçxa Dxus pukate jxkaahna ãsa', aça' txã'sa' angeleswe'sx ma'wēsawa txã'sçxaçxáanatx nwēese'je'.

4

Selpiia' ãjawa'ja's Dxus ma'wē ãste' kxtey yuuwa'ja'

¹⁻² Kristowa ma'wēga txajx kakwete akasa's jxpa'gana pxthaa yuu, txã'wēy i'kwe'sxwa pxthaa yuuwa'jsatha'w sũhna meswe, txãa pa'gatey peekx kakwete ewmée yũuya' yaakxni pkala's nvxihtçxa, Dxus jxthãasniçxá's uu entepkaçx kxtey yuuya' yaakxpa'gak pxthaa yuuwa'j en pa'ja'.

³ Pkala's nwēese'jmée nvxiht-ya'ii nyafxii entey wala yã'jne'kwe nwēese'j Dxusa's jiimeesawe'sx yakh ja'daçxah. Txãa ensu' i'kwe'sxa' ewmée i'kwe yũuna fxi'ze peekx kakweju ewmée yũuya' yajxna, tũuna, ku'jna, pkhaakheçxa tudxna, Dxus ãtximeesatx neewe'wena.

⁴ Txã'wē yũusai'kwe yu'. Nawa ãçxha' i'kwe'sxa' peena yu' txãawe'sx yakh txã'wē

iiméh seena' ewmée yūuna fxi'ze'çmeene'kwe, txāa pa'ga ne'ta i'kwe'stxxi' ewmée nuywe'wena açe'.

⁵ Nawa txāawe'sxa' Dxusna paswa'j ji'phutxna, itxisa ma'tx yuu meeçxa uuniisa ma'tx yuu nawa jxukaysatx paapēywa'j ente'.

⁶ Uusaawe'sx ma'tx yuu nawa paapēy ente' kakwe ji'phsa na'wēyçxāa paapēyni yuutxna. Aça' uute' ūus yu' Dxus na'wēyçxāa itxi ūskahnku txā'wē pta'sxni yuu. Txā'wē yu-uwa'jsate íçxāak uusaawe'stxxiwa Dxus yuwe's pta'sxni yuu txāawe'sx uumeyna.

⁷ Naa kiwe pçuwa'j ena' utxaaça'. Txāa pa'ga i'kwe'sxa' wala jxpa'yakx meswe, naasāa Dxus yakh yuuçxāa puutx we'wena mfxi'zewe.

⁸ Nawa i'kwe'sx pwe'sx puutx peeygāawa'ja's wejx jxthaakwe mpa'pçxuwe, txāa pa'gatey peeygāanisa' pkal makwesanaawa jxuka kaapel-tunaĩ'kh jĩ'k.

⁹ Yakthē'jwe'stxxi yat mpeeki'jwe wa'lmée.

¹⁰ Teeçxsa na'wēçxah puutx ya'mpu'çxwe, i'kwe'sx selpiia' ājawa'ja's Dxus ma'wēne' ūs txā'sa' kxtey yuuna. Dxusa's selpiwa'ja's nakwe wala kuh jwed ūsni yuuk txā'sa' jxpa'gaçxa', ew kaaselpi'jsa myuuwe.

¹¹ Maaiia' pta'sxwa'j ji'phçxa', peekx ūuste yaakxni's we'wemée Dxus we'weniçxā's pta'sxwa'ja'. Maawa vxitetx pu'çxya' yaakiççxa', Dxus makwe kçxhāaçxha'jana txā's yu' jxuka kxtey yuua'ja'. Kĩh yūuççxawa Dxusa's weçxaawa'ja'sçxāa yajkxna txā'wē yūuwa'ja' Jesukristo's pi'kxçxa, txāa pa'gatey kījkiħwa

jxuka Dxus j̄īçxaçáata' багаçxtewa nes yuuwa'jsa.

Nxuswa'j en pa'the weçxana fxi'zewa'ja'

¹² Yakhthē'jwe'sx, Kristo's nwēese'pha'ga nxuswa'j en pa'the', fxiy yuh yu'k sūhna kuh yaakxnuwe,

¹³ wejxwa Kristo na'wēy nxuswa'ja's ji'phuçthu sūhna wēt miiyajkxwe. Txā'wē yūuçxa', txajx kīi ente' weçxaawa'ja's wala uyuune'kwe.

¹⁴ Kristo yakh fxi'zepa'ga ahçena wēesxute', i'kwe'sxa' nxusmēe mweeçxawe, txāa pa'gatey Dxus Espiritu' i'kwe'sx ūuste ūsa' nxusmēe weçxweçxa kaayaki'jwa'jsa. Kristo' txāawe'sx yaaçenik fxi'ze', nawa i'kwe'sx yu' txā'sa' weçxana i'kwe fxi'ze'.

¹⁵ I'kwe'sxa' maa yuhwa nxus knaywa'j ji'phuwa'j ji'phmēe i'kwe, na'wē yūuçxa: nasa ikhna, pesweena, ewmēe yūuna, īsxiina yuwe ksuusu'jna fxi'zena. Txā'wē yūuçxa nxus knaywa'j yu'sa' ji'phunuwe, wala thaampa'sa'.

¹⁶ Nawa Kristo's selpiipa'ga nxuswa'j en ji'phuçxa', thaamewa'jme', wejxwa Dxusa's weçxana tuuthe'jwa'ja'.

¹⁷ Txā'wēme', makwe Dxus luuçxte yuhwa nxuswa'j ena' txāawe'sx yakh khuē'yku takh na' āçxh nmeh ente' çma'wē seena' thaakwe nxus yujkx Dxus yuwe's nwēese'jsamēe yakha'?

¹⁸ Dxus luuçx yuhwa wala nxus knayçxa nwe'weni yuute', pkalsa ewmeesa yu' çmtee yuuya' u'jwetxki?

¹⁹ Txā'wē Dxus jxthāasnite nxuswa'j en ji'phuçxa', nxusmēe fxi'zewa'ja' peekx ūustxi

Dxus kusete neewe'wena. Txãak kwe'sxtxi taki'j na' txãáiçxáa nwe'wena.

5

Dxus yakh fxi'zesatx yu'kxpehni

¹ Ancianowe'sxtxi yu'kxpejeçthu, adxwa txãawe'sx na'wěysa íçxáath, sa' Kristo pxthaa yuuni'swa uysaath, sa' txãawe'sx na'wěy cielutewa ũswa'jsath.

² I'kwe'sx kusete neewe'weni ũsta' Dxus luuçx txãatx jxpa'yakx miipe'jwe, piisxáa-thegsa na'wě. Sa' vxyuu jxpa'gawa'jçxá's yajkxna txã'wě yũumée, Dxus jxthãasniçxá's kxtey myu-uwe, wa'lmée weçxana ewçxáa yũuna.

³ Sa' Dxus luuçx i'kwe'sx jxpe'jnitx juuna' we'wenawa jxkaahwa'jme', kxah i'kwe'sx fxi'zeni's piyaatxna.

⁴ Txã'wě yũuçxa', kwe'sxtxi jxpe'jsa jxthaakwe jxtuhthesa vxyaate', i'kwe'sxa' jxpa'gane'kwe peesni iiméh zhiçxkwesa's txã' naa kiwega peesnisa pçu'tx txã'wěsa meeta'.

⁵ Piçtakxwe'sxwa txã'wěy ancianowe'sx we'weni's kxtey myuuwe. Jxukaysa puutx ya'nwěese'jna fxi'zewa'ja' iiwejçx yajkxmée. Txã'wěme', Dxusa' pu'çxhi'çme' iiwejçx yaakxsatxi's, nawa iiwejçx yaakxsameetxi's peeygãhnak pu'çxhi'.

⁶ Txã'wě yã'the', Dxusa's mwěese'jwe, txajx kuseteçxaçxáa jxuka ya'dukhna, kxah i'kwe'sx txã'wě yũunijũ', Dxusa' i'kwe'sxtxi' walasa vxi-tuna.

⁷ Txãa pa'ga i'kwe'stxxi kîh thêysa vxyaatewa, txã'sa' jxuka Dxus kuseteçxaçxãa manvxihtwe, txãa pa'gatey txã' i'kwe'stxxi thegsa' naa pa'ga.

⁸ I'kwe'sxa' jxpa'yakx meswe. Txã'wême', i'kwe'stxxi açesa eçxthê'ja' kimçxáanawa ikhya' sũhna león na'wê seena' pebeena pakwena u'ju'.

⁹ Nawa eçxthê'ja's weh yuhwa nwêese'jnuwe Dxusa's çxhãçxha yajkxna, txãa pa'gatey i'kwe'sxçxáamée txã'wê pxthaa nxusna ũsi'kwe, yakhthê'jwe'sx msuuwe'sxwa jxuka txã'wêçxaçxãa pxthaa yuuna ũsta'.

¹⁰ Nawa i'kwe'sx maz en pxthaa yuuniijũ', Dxus kîhtewa jxuka pu'çxsa' kçxhãaçxha'jana jxpubana sxiigmée ew fxi'zewa'ja's pu'çxna. Txãa Dxusiçxáak kwe'stxxi pa'ya, Jesukristo yakh bagaçxte yuhwa pçumée ũswa'the.

¹¹ Txãa pa'ga bagaçxtewa txã's yuuçxáana weçxaaga.

Yuwe weçxaa kaahnitx pta'sxna fxi'jni

¹² Naa karta's fxi'jçxa kajaçthu ew fxi'zesa yakhthê'j Silwano yakh. Kxteea' jxu'jmeekweth yu'kxpeje', na'wê Dxus pu'çxni's jxpa'gai'kwe txã' Dxusa' peeygãasa yuhna sũhwa'ja's ew kaajiyu'jsata'. Aça' txã'wê ũusutheni's peçxkanamée mfxi'zewe.

¹³ I'kwe'sx na'wêy Dxus txhitxhnisa Babilonia kiwete ũsta' txãawe'sxwa yuwe weçxaa kaja'tx, aça' adx nçxi'k na'wêsa Markoswa yuwe weçxaa kaja'k.

¹⁴ Puutx pta'sxna yuwe meen weëçxawe, teeçxsa na'wêçxah ya'peeygãhna.

Jesukristo's nwěese'jsa i'kwe'sx jxukaysa
ewçxáa mfxi'zewe.

Páez

Páez: Dyus Yuwe U'sesa New Testament

copyright © 1984 Wycliffe Bible Translators, Inc.

Language: Páez

Contributor: Wycliffe Bible Translators, Inc.

All rights reserved.

2025-05-20

PDF generated using Haiola and XeLaTeX on 19 Dec 2025 from source
files dated 20 May 2025

06da09f4-8d0f-5001-ae8c-0e6aa0131ffd